

大寶積經·無量壽如來會



沈陽北塔

ᠰᠢᠶᠠᠨ ᠪᠢᠲᠠ

大寶積經·無量壽如來會

譯者 唐·菩提流志三藏

版次 2017年11月試用版

責任編輯 寧可

校排 寧可

裝幀設計 國東旭

地址 瀋陽市崇山東路北塔街27號護國法輪寺

郵編 110032

結緣電話 024-86626135

網站 www.beita.org

信箱 zhflt@126.com

淘寶結緣 Shenyangbeita.taobao.com



香讚

爐香乍爇，法界蒙熏。諸佛海會悉遙聞，隨處結祥雲。誠意方殷，諸佛現全身。

南無香雲蓋菩薩摩訶薩！（三稱）

歸依發心

諸佛正法賢聖三寶尊，
從今直至菩提永歸依，
我以所修施等諸資糧，
為利有情故願大覺成。（三遍）

四無量

願諸眾生具足安樂及安樂因！
願諸眾生遠離痛苦及痛苦因！
願諸眾生不離無苦之樂！
願諸眾生遠離親疏貪嗔，住平等舍！

（三遍）

稱聖號

南無本師釋迦牟尼佛！（三稱）

開經偈

無上甚深微妙法，百千萬劫難遭遇，
我今見聞得受持，願解如來真實義。

大寶積經卷第¹十七²

大³唐三藏⁴菩提流志奉 詔⁵譯

無量壽如來會第五之一⁶

如是我聞：

一時佛住王舍城耆闍崛山中，與大比丘眾萬二千人俱，皆是諸大聲聞眾所知識，其名曰：尊者阿若憍陳如、馬勝、大名有賢、無垢、須跋陀羅、善稱圓滿、憍梵鉢提、優樓頻伽迦葉、那提迦葉、伽耶迦葉、摩訶迦葉、舍利弗、大目犍連、摩訶迦旃延、摩訶劫賓那、摩訶注那、滿慈子、阿尼樓駄、離波多、上首王⁷、住彼岸摩俱羅、難陀、有光善來、羅睺羅、阿難陀等，而為上首。復有菩薩摩訶薩眾，所謂普賢菩薩、文殊

¹ 〔第〕－【聖】

² 卷第十七缺【宮】

³ 〔大〕－【明】

⁴ 三藏＋（法師）【明】

⁵ 〔奉詔〕－【宋】、詔＝制【聖】

⁶ 一＝上【元】

⁷ 王＝正【明】

師利菩薩、彌勒菩薩，及賢劫中諸菩薩摩訶薩眾，前後圍繞。

又與賢護等十六丈夫眾俱，所謂善思惟義菩薩、慧辯才菩薩、觀無住菩薩、善化¹神通菩薩、光幢菩薩、智上菩薩、寂根菩薩、慧願菩薩、香象菩薩、寶幢菩薩等，而為上首，咸共遵修普賢之道，滿足菩薩一切行願，安住一切功德法中，到諸佛法究竟彼岸。願於一切世界之中成等正覺，又願生彼兜率陀天，於彼壽終降生右脇見行七步，放大光明，普佛世界六種震動，而自唱言：“我於一切世間最為尊貴。”釋梵諸天咸來親奉。又見²習學書計曆數聲明伎巧醫方養生符印，及餘博戲擅美過人。身處王宮厭諸欲境，見老病死悟世非常，捐捨國位踰城學道。解諸纓絡及³迦尸迦，被服袈裟六年苦行，能於五濁剎中作斯示見。順世間故浴尼連河行趣道場，龍王迎讚，諸菩薩眾右繞稱揚。菩薩爾時受草，自敷菩提樹下，結加⁴趺坐。又見魔眾

¹ 化=華【宋】【元】【明】【聖】

² 見=現【宋】【元】【明】【聖】

³ 纓絡及=瓔珞反【聖】

⁴ 加=跏【元】【明】

合圍將加危害，菩薩以定慧力降伏魔怨，成無上覺。梵王勸請轉於法輪，勇猛無畏佛音震吼，擊法鼓、吹法螺、建大法幢、然正法炬，攝受正法及諸禪定，雨大法雨澤潤含生，震大法雷開悟一切。諸佛刹土普照大光，世界之中地皆震動，魔宮摧毀驚怖波旬，破煩惱城¹墮諸見網，遠離黑法生諸白法。於佛²施食能受能消，為調眾生宣揚妙理。或見微笑放百千光，昇灌頂階受菩提記，或成佛道見³入涅槃，使無量有情皆得漏盡，成熟菩薩無邊善根。如是諸佛刹中皆能示見⁴。譬如幻師善知幻術，而能示見⁵男女等相，於彼相中實無可得。如是如是，諸菩薩等善學無邊幻術功德故，能示見⁶變化相應，能善了知變化之道故，示諸佛土見⁷大慈悲，一切群生普皆饒益。菩薩願行成就無疆，無量義門通達平等，一切善法具足修成。諸佛刹中平等

¹ 城=賊【明】

² 佛=信【元】【明】

³ 見=現【宋】【元】【明】【聖】

⁴ 見=現【宋】【元】【明】【聖】

⁵ 見=現【宋】【元】【明】【聖】

⁶ 見=現【宋】【元】【明】【聖】

⁷ 見=現【宋】【元】【明】【聖】

趣入，常為諸佛勸進加威。一切如來識知印可，為教菩薩作阿闍梨。常習相應無邊諸行，通達一切法界所行，能善了知有情及土，亦常發趣供諸如來。見種種身猶如影像，善學因陀羅網能破魔網，壞諸見網入有情網，能超煩惱眷屬及魔侶魔人。遠出聲聞辟支佛地，入空無相無願法門，而能安住方便善巧。初不樂入二乘涅槃，得無生無滅諸三摩地，及得一切陀羅尼門，廣大諸根辯才決定，於菩薩藏法善能了知。佛華三昧隨時悟入，具一切種甚深禪定，一切諸佛皆悉見¹前，於一念中遍遊佛土，周旋往返不異其時。於難非難邊能了諸邊，敷演實際差別善知，得佛辯才住普賢行。善能分別眾生語言，超過世間一切之法，善知一切出世間法。得資具自在波羅蜜多，荷擔有情為不請友。能持一切如來法藏，安住不斷一切佛種。哀愍有情能開法眼，閉諸惡趣開善趣門。普觀有情能作父母兄弟之想，又觀眾生如己身想。證得一切讚歎功德，波羅蜜多能善了知，讚歎如來一切功德，及餘稱讚諸功德法。如是菩薩摩訶薩眾無量無邊皆來集會。

¹ 見=現【宋】【元】【明】【聖】

爾時尊者阿難從坐而起，整理衣服，偏袒右肩右膝著地，合掌向佛，白言：“大德世尊！身色諸根悉皆清淨，威光赫奕如融金聚，又如明鏡凝照光暉。從昔已來初未曾見，喜得瞻仰生希有心。世尊今者入大寂定，行如來行皆悉圓滿，善能建立大丈夫行，思惟去來現在諸佛。世尊何故住斯念耶？”

爾時佛告阿難：“汝今云何能知此義？為有諸天來告汝耶？為以見我及自知耶？”

阿難白佛言：“世尊！我見如來光瑞希有故發斯念，非因天等。”

佛告阿難：“善哉善哉！汝今快問。善能觀察微妙辯才，能問如來如是之義。汝為一切如來、應、正等覺，及安住大悲利益群生如優曇花希有大士出見¹世間，故問斯義。又為哀愍利樂諸眾生故，能問如來如是之義。阿難！如來、應、正等覺善能開示無量知見。何以故？如來知見無有障礙。阿難！如來、應、正等覺欲樂住世，能於念頃住無量無數百千億那由他劫，若復增過如上數量，而如來身及以諸根無有增減。何

¹ 見=現【宋】【元】【明】【聖】

以故？如來得三昧自在到於彼岸，於一切法最勝自在。是故阿難！諦聽，善思念之，吾當為汝分別解說。”

阿難白佛言：“唯然世尊！願樂欲聞。”

爾時佛告阿難：“往昔過阿僧祇無數大劫，有佛出現¹，號曰然燈。於彼佛前極過數量，有苦行佛出興于世。苦行佛前復有如來，號為月面。月面佛前過於數量，有旃檀香佛。於彼佛前有蘇迷盧積佛，盧積佛前復有妙高劫佛。如是展轉，有離垢面佛、不染污佛、龍天佛、山聲王佛、蘇迷盧積佛、金藏佛、照曜光佛、光帝佛、大地種姓²佛、光明熾盛琉璃金光佛、月像佛、開敷花莊嚴光佛、妙海勝覺遊戲神通佛、金剛光佛、大阿伽陀香光佛、捨離煩惱心佛、寶增長佛、勇猛積佛、勝積佛、持大功德法施神通佛、映蔽日月光佛、照曜琉璃佛、心覺花佛、月光佛、日光佛、花瓔珞色王開敷神通佛、水月光佛、破無明暗佛、真珠珊瑚蓋佛、底沙佛、勝花佛、法慧吼佛、有師子吼鴈聲佛、梵音龍吼佛。如是等佛出現於世，相去劫數皆過數量。彼龍吼佛未出世前無央數劫，有世主佛。世主佛前無

¹ 現=見【宋】

² 姓=性【元】【明】

邊劫數有佛出世，號世間自在王如來、應、正等覺、明行圓滿、善逝、世間解、無上丈夫、調御士、天人師、佛、世尊。

“阿難！彼佛法中有一比丘名曰法處，有殊勝行願及念慧力增上，其心堅固不動，福智殊勝人相端嚴。阿難！彼法處比丘往詣世間自在王如來所，偏袒右肩頂禮佛足，向佛合掌以頌¹讚曰：

“如來無量無邊光，舉世無光可能喻，
一切日月摩尼寶，佛之光威皆映蔽。
世尊能演一音聲，有情各各隨類解，
又能現一妙色身，普使眾生隨類見。
戒定慧進及多聞，一切有情無與等，
心流覺慧如大海，善能了知甚深法。
惑盡過亡應受供，如是聖德惟世尊，
佛有殊勝大威光，普照十方無量刹。
我今稱讚諸功德，冀希福慧等如來，
能救一切諸世間，生老病死眾苦惱。
願當安住三摩地，演說施戒諸法門，

¹ 頌=偈【明】

忍辱精勤及定慧，庶當成佛濟群生。
為求無上大菩提，供養十方諸妙覺，
百千俱胝那由他，極彼恒沙之數量。
又願當獲大神光，倍照恒沙億佛刹，
及以無邊勝進力，感得殊勝廣淨居。
如是無等佛刹中，安處群生當利益，
十方最勝之大士，彼皆當往生喜心。
唯佛聖智能證知，我今希求堅固力，
縱沈無間諸地獄，如是願心終不退。
一切世間無礙智，應當了知如是心。’

“復次阿難！法處比丘讚佛德已白言：‘世尊！我今發阿耨多羅三藐三菩提心，惟¹願如來為我演說如是等法，令於世間得無等等成大菩提，具攝清淨莊嚴佛土。’佛告比丘：‘汝應自攝清淨佛國。’法處白佛言：‘世尊！我無威力堪能攝受，唯願如來說餘佛土清淨莊嚴，我等聞已誓當圓滿。’爾時世尊為其廣說二十一億清淨佛土具足莊嚴，說是法時經于億歲。阿

¹ 惟=唯【聖】

難！法處比丘於彼二十一億諸佛土中所有嚴淨之事悉皆攝受，既攝受已滿足五劫思惟修習。”

阿難白佛言：“世尊！彼世間自在王如來壽量幾何？”

世尊告曰：“彼佛壽量滿四十劫。阿難！彼二十一俱胝佛刹，法處比丘所攝佛國超過於彼。既攝受已，往詣世間自在王如來所，頂禮雙足右繞七匝，却住一面白言：‘世尊！我已攝受具足功德嚴淨佛土。’佛言：‘今正是時，汝應具說令眾歡喜，亦令大眾皆當攝受圓滿佛土。’

“法處白言：‘唯願世尊大慈留聽，我今將說殊勝之願。

“‘若我證得無上菩提，國中有地獄、餓鬼、畜生趣者，我終不取無上正覺。

“‘若我成佛，國中眾生有墮三惡趣者，我終不取正覺。

“‘若我成佛，國中有情若不皆同真金色者，不取正覺。

“‘若我成佛，國中有情形貌差別有好醜者，不取正覺。

“‘若我成佛，國中有情不得宿念，下¹至不知億那由他百千劫事者，不取正覺。

“‘若我成佛，國中有情若無天眼，乃至不見億那由他百千佛國土者，不取正覺。

“‘若我成佛，國中有情不獲天耳，乃至不聞億那由他百千踰繕那外佛說法者，不取正覺。

“‘若我成佛，國中有情無他心智，乃至不知億那由他百千佛國土中有情心行者，不取正覺。

“‘若我成佛，國中有情不獲神通自在波羅蜜多，於一念頃不能超過億那由他百千佛刹者，不取正覺。

“‘若我成佛，國中有情起於少分我我所想者，不取菩提。

“‘若我成佛，國中有情若不決定成等正覺、證大涅槃者，不取菩提。

“‘若我成佛，光明有限，下至不照億那由他百千及算數佛刹者，不取菩提。

“‘若我成佛，壽量有限，乃至俱胝那由他百千及算數劫者，不取菩提。

¹ 念下=命乃【明】

“若我成佛，國中聲聞無有知其數者，假使三千大千世界滿中有情及諸緣覺，於百千歲盡其智算亦不能知；若有知者，不取正覺。

“若我成佛，國中有情壽量有限齊者，不取菩提；唯除願力而受生者。

“若我成佛，國中眾生若有不善名者，不取正覺。

“若我成佛，彼無量剎中無數諸佛不共諮嗟稱歎我國者，不取正覺。

“若我證得無上覺時，餘佛剎中諸有情類聞我名已，所有善根心心迴向願生我國，乃至十念若不生者，不取菩提；唯除造無間惡業、誹謗正法及諸聖人。

“若我成佛，於他剎土有諸眾生發菩提心，及於我所起清淨念，復以善根迴向願生極樂。彼人臨命終時，我與諸比丘眾現其人前。若不爾者，不取正覺。

“若我成佛，無量國中所有眾生聞說我名，以己善根迴向極樂。若不生者，不取菩提。

“若我成佛，國中菩薩皆不成就三十二相者，不取菩提。

“若我成佛，於彼國中所有菩薩，於大菩提咸悉位階一生補處。唯除大願諸菩薩等，為諸眾生被精

進甲，勤行利益修大涅槃，遍諸佛國行菩薩行，供養一切諸佛如來，安立洄¹沙眾生住無上覺，所修諸行復勝於前，行普賢道而得出離。若不爾者，不取菩提。

“若我成佛，國中菩薩每於晨朝供養他方乃至無量億那由他百千諸佛，以佛威力即以食前還到本國。若不爾者，不取菩提。

“若我成佛，於彼刹中諸菩薩眾所須種種供具，於諸佛所殖²諸善根，如是色類不圓滿者，不取菩提。

“若我當成佛時，國中菩薩說諸法要不善順入一切智者，不取菩提。

“若我成佛，彼國所生諸菩薩等若無那羅延堅固力者，不取正覺。

“若我成佛，周遍國中諸莊嚴具，無有眾生能總演說，乃至有天眼者不能了知所有雜類形色光相。若有能知及總宣說者，不取菩提。

“若我成佛，國中具有無量色樹高百千由旬，諸菩薩中有善根劣者若不能了知，不取正覺。

¹ 洄=恒【宋】【元】【明】

² 殖=植【宋】【元】【明】

“若我成佛，國中眾生讀誦經典教授敷演，若不獲得勝辯才者，不取菩提。

“若我成佛，國中菩薩有不成就無邊辯才者，不取菩提。

“若我成佛，國土光淨遍無與等，徹照無量無數不可思議諸佛世界，如明鏡中現其面像。若不爾者，不取菩提。

“若我成佛，國界之內地及虛空有無量種香，復有百千億那由他數眾寶香鑪¹，香氣普熏遍虛空界，其香殊勝超過人天珍，奉如來及菩薩眾。若不爾者，不取菩提。

“若我成佛，周遍十方無量無數不可思議無等界眾生之輩，蒙佛威光所照觸者，身心安樂超過人天。若不爾者，不取正覺。

“若我成佛，無量不可思議無等界諸佛剎中菩薩之輩聞我名已，若不證得離生、獲陀羅尼者，不取正覺。

¹ 鑪=爐【宋】【元】【明】【聖】

“若我成佛，周遍無數不可思議無有等量諸佛國中所有女人，聞我名已得清淨信，發菩提心厭患女身。若於來世不捨女人身者，不取菩提。

“若我成佛，無量無數不可思議無等佛刹菩薩之眾，聞我名已得離生法，若不修行殊勝梵行，乃至到於大菩提者，不取正覺。

“若我成佛，周遍十方無有等量諸佛刹中所有菩薩，聞我名已五體投地，以清淨心修菩薩行。若諸天人不禮敬者，不取正覺。

“若我成佛，國中眾生所須衣服隨念即至，如佛命：“善來，比丘。”法服自然在體。若不爾者，不取菩提。

“若我成佛，諸眾生類纔生我國中，若不皆獲資具心淨安樂如得漏盡諸比丘者，不取菩提。

“若我成佛，國中群生隨心欲見諸佛淨國殊勝莊嚴，於寶樹間悉皆出現，猶如明鏡見其面像。若不爾者，不取菩提。

“若我成佛，餘佛刹中所有眾生聞我名已，乃至菩提諸根有闕、德用非廣者，不取菩提。

“若我成佛，餘佛刹中所有菩薩聞我名已，若不皆善分別勝三摩地名字語言，菩薩住彼三摩地中，

於一剎那言說之頃不能供養無量無數不可思議無等諸佛，又不現證六三摩地者，不取正覺。

“‘若我成佛，餘佛土中有諸菩薩聞我名已，壽終之後若不得生豪貴家者，不取正覺。

“‘若我成佛，餘佛刹中所有菩薩聞我名已，若不應時修菩薩行，清淨歡喜得平等住具諸善根¹，不取正覺。

“‘若我成佛，他方菩薩聞我名已，皆得平等三摩地門，住是定中常供無量無等諸佛，乃至菩提終不退轉。若不爾者，不取正覺。

“‘若我成佛，國中菩薩隨其志願，所欲聞法自然得聞。若不爾者，不取正覺。

“‘若我證得無上菩提，餘佛刹中所有菩薩聞我名已，於阿耨多羅三藐三菩提有退轉者，不取正覺。

“‘若我成佛，餘佛國中所有菩薩若聞我名，應時不獲一二三忍、於諸佛法不能現證不退轉者，不取菩提²。’”

¹ 根+（者）【宋】【元】【明】

² 提+（四十八願）【元】【明】

爾時佛告阿難：“彼法處比丘於世間自在王如來前發此願已，承佛威神而說頌曰：

“今對如來發弘誓，當證無上菩提日，
若不滿足諸上願，不取十力無等尊。
心或不堪常行施，廣濟貧窮免諸苦，
利益世間使安樂，不成救世之法王。
我證菩提坐道場，名聞不遍十方界，
無量無邊異佛刹，不取十力世中尊。
方趣無上大菩提，出家為求於¹欲境，
於彼念慧行無有，不作調御天人師。
願獲如來無量光，普照十方諸佛土，
能滅一切貪恚癡，亦斷世間諸惡趣。
願得光開淨慧眼，於諸有中破冥暗，
除滅諸難使無餘，安處天人大威者。
修習本行已清淨，獲得無量勝威光，
日月諸天摩尼火，所有光暉皆映蔽。
最勝丈夫修行已，於彼貧窮為伏藏，
圓滿善法無等倫，於大眾中師子吼。

¹ 於=捨【明】

往昔供養自然智，多劫勤修諸苦行，
為求最勝諸慧蘊，滿足本願天人尊。
如來知見無所礙，一切有為皆能了，
願我當成無與等，最勝智者真導師。
我若當證大菩提，如斯弘誓實圓滿，
願動三千大千界，天眾空中皆雨花。
是時大地咸震動，天花鼓樂滿虛空，
并雨栴檀細末香，唱言未來當作佛。’”

佛告阿難：“彼法處比丘於世間自在王如來。及諸天人魔梵沙門婆羅門等前，廣發如是大弘誓願，皆已成就世間希有。發是願已，如實安住種種功德，具足莊嚴威德廣大清淨佛土。修習如是菩薩行時，經於無量無數不可思議無有等等億那由他百千劫內，初未曾起貪瞋及癡欲害恚想，不起色聲香味觸想，於諸眾生常樂愛敬猶如親屬，其性溫和易可同處。有來求者不逆其意，善言勸諭¹無不從心，資養所須趣²支身命。少欲知足常樂虛閑，稟識聰明而無矯妄。其性調順無有暴惡，於諸有情常懷慈忍。心不詐諂亦無懈怠，善

¹ 諭=喻【宋】

² 趣=取【宋】【元】【明】【聖】

言策進求諸白法。普為群生勇猛無退，利益世間大願圓滿。奉事師長敬佛法僧，於菩薩行常被甲冑，志樂寂靜離諸染著。為令眾生常修白法，於善法中而為上首，住空無相無願、無作無生、不起不滅無有憍慢。而彼正士行菩薩道時，常護語言，不以語言害他及己，常以語業利己及人。若入王城及諸村落，雖見諸色心無所染，以清淨心不愛不恚。菩薩爾時於檀波羅蜜起自行已，又能令他行於惠施。於尸波羅蜜乃至般若波羅蜜，起前二行皆悉圓滿。由成如是諸善根故，所生之處有無量億那由他百千伏藏自然涌出，復令無量無數不可思議無等無邊諸眾生類，安住阿耨多羅三藐三菩提。如是無邊諸菩薩眾起諸妙行，供養奉事於諸²世尊乃至成佛，皆不可以語言分別之所能知。或作輪王、帝釋、蘇焰摩天、兜率陀天、善化天、他化自在天、大梵天王，皆能奉事供養諸佛，及能請佛轉於法輪。若作閻浮提王及諸長者、宰官、婆羅門、刹帝利等，諸種姓中皆能尊重供養諸佛，又能演說無量法門。從此永棄世間，成無上覺。然彼菩薩能以上妙衣服臥具

¹ 惠 = 慧【聖】

² 於諸 = 諸佛【宋】【元】【明】

飲食醫藥，盡形供養一切如來得安樂住。如是種種圓滿善根，非以語言能盡邊際。口中常出栴檀妙香，其香普熏無量無數乃至億那由他百千世界，復從一切毛孔出過人天優鉢羅花上妙香氣。隨所生處，相好端嚴殊勝圓滿。又得諸資具自在波羅蜜多，一切服用周遍無乏。所謂諸寶香花幢幡繒蓋、上妙衣服飲食湯藥，及諸伏藏珍玩所須，皆從菩薩掌中自然流出，身諸毛孔流出一切人天音樂。由是因緣，能令無量無數不可思議諸眾生等，安住阿耨多羅三藐三菩提。阿難！我今已說法處菩薩本所修行。”

爾時阿難白佛言：“世尊！彼法處菩薩成菩提者，為過去耶？為未來耶？為今現在他方世界耶？”

佛告阿難：“西方去此十萬億佛刹，彼有世界名曰極樂。法處比丘在彼成佛，號無量壽，今現在說法，無量菩薩及聲聞眾恭敬圍繞。

“阿難！彼佛光明普照佛刹無量無數不可思議，我今略說，光照東方如恒河沙等國土，南西北方四維上下亦復如是，唯除諸佛本願威神所加，悉皆照燭。是諸佛光，或有加一尋者，或有加一由旬乃至億那由他百千由旬光者，或普照佛刹者。阿難，以是義故，無量壽佛復有異名，謂無量光、無邊光、無著光、無

礙光、光照王端嚴光、愛光、喜光、可觀光、不思議光、無等光、不可稱量光、映蔽日光、映蔽月光、掩奪日月光。彼之光明清淨廣大，普令眾生身心悅樂，復令一切餘佛刹中天、龍、夜叉、阿修羅等皆得歡悅。阿難！我今開示彼佛光明，滿足一劫說不能盡。

“復次阿難！彼無量壽如來，諸聲聞眾不可稱量知其邊際。假使比丘滿億那由他百千數量，皆如大目捷連神通自在，於晨朝時周歷大千世界、須臾之頃還至本處，彼經億那由他百千歲數欲共計算無量壽佛初會之中諸聲聞眾，盡其神力乃至滅度，於百分中不知其一、於千分百千分乃至鄔波尼殺曇分中亦不知其一。阿難！譬如大海深八萬四千由旬，以目極觀不知邊際。若有丈夫析一毛端為五十分，以其一分於大海中霑取一滴。阿難！彼之水滴比於大海，何者為多？”

阿難白言：“假使取千由旬水，猶以為少，況以毛端一分而可方之！”

佛告阿難：“假使比丘滿億那由他百千數量，皆如大目捷連，經百千億那由他歲皆共算數彼無量壽如來初會聲聞，所知數量如彼毛端一滴之水，餘不測者猶如大海。諸菩薩摩訶薩眾亦復如是，非以算計之所能知。

“阿難！彼佛壽命無量無邊，不可知其劫數多少；聲聞、菩薩及諸天人，壽量亦爾。”

阿難白佛言：“世尊！彼佛出世于今幾時，能得如是無量壽命？”

佛告阿難：“彼佛受生，經今十劫。

“復次阿難！彼極樂界無量功德具足莊嚴，國土豐稔天人熾盛，志意和適常得安隱，無有地獄、畜生及琰魔王界。有種種香周遍芬馥，種種妙花亦皆充滿。有七寶幢周布行列，其寶幢上懸諸幡蓋及眾寶鈴，具足百千諸妙雜色。

“阿難！彼如來國多諸寶樹，或純黃金、白銀、琉璃、頗梨¹、赤珠、馬瑙²、玉樹，唯一寶成不雜餘寶，或以二寶乃至七寶莊嚴。阿難！彼金為樹者，以金為根莖，白銀為葉及以花果。白銀之樹，銀為根莖，黃金為葉及以花果。馬瑙之樹，馬瑙根莖，美玉為葉及以花果。美玉樹者，玉為根莖，七寶為葉及諸花果。或有金樹，黃金為根，白銀為莖，琉璃為枝，頗梨為條，赤珠為葉，馬瑙為花，美玉為果。或有銀樹，以

¹ 頗梨＝玻璃【明】下同，＝頗黎【聖】下同，宋本混用

² 馬瑙＝碼瑙【宋】下同【元】下同【明】下同

銀為根，黃金為莖，餘枝果等飾同金樹。琉璃樹者，琉璃為根，黃金為莖，白銀為枝，頗梨為條，赤珠為葉，馬瑙為花，美玉為果。頗梨、真珠、馬瑙等樹，諸寶轉飾皆若琉璃。復有玉樹，玉為其根，黃金為莖，白銀為枝，琉璃為條，頗梨為葉，赤珠為花，馬瑙為果。復有無量摩尼珠等寶莊嚴樹，周遍其國。是諸寶樹光輝赫奕世無能比，以七寶羅網而覆其上，其網柔軟如兜羅綿。

“復次阿難！無量壽佛有菩提樹，高十六億由旬，枝葉垂布八億由旬。樹本隆起高五千由旬，周圓亦爾。其條葉花果常有無量百千種種妙色，及諸珍寶殊勝莊嚴，謂月光摩尼寶、釋迦毘楞伽寶、心王摩尼寶、海乘流注摩尼寶，光輝遍照超過人天。於其樹上有諸金鎖¹垂寶瓔珞周遍莊嚴，謂盧遮迦寶、末瑳寶，及赤白青色真珠等寶以為瓔珞。有師子雲聚寶等以為其鎖²，飾諸寶柱。又以純金真珠雜寶鈴鐸以為其網，莊嚴寶鎖³彌覆其上，以頗梨萬字半月寶等互相映飾，微風

¹ 鎖=瑠【聖】

² 鎖=瑠【聖】

³ 鎖=瑠【聖】

吹動出種種聲，令千世界諸眾生等隨樂差別，於甚深法證無生忍。阿難！彼千世界諸有情等聞此音已，住不退轉無上菩提，及無量無數有情得無生法忍。

“復次阿難！若有眾生見菩提樹、聞聲、嗅香、嘗其果味、觸其光影、念樹功德，由此因緣乃至涅槃，五根無患心無散亂，皆於阿耨多羅三藐三菩提得不退轉。復由見彼菩提樹故獲三種忍。何等為三？一者隨聲忍，二者隨順忍，三者無生法忍。此皆無量壽佛本願威神見所加，及往修靜慮無比喻故、無缺減故、善修習故、善攝受故、善成就故。

大寶積經卷第十七¹

¹ 光明皇后願文【聖】

北塔法輪寺

北塔法輪寺

北塔法輪寺

北塔法輪寺

大寶積經卷第¹十八²

大³唐三藏⁴菩提流志奉 詔譯

無量壽會第五之二⁵

“復次阿難！彼極樂界，無諸黑山、鐵圍山、大鐵圍山、妙高山等。”

阿難白佛言：“世尊！其四天王天、三十三天，既無諸山，依何而住？”

佛告阿難：“於汝意云何？妙高已上有夜摩天乃至他化自在天，及色界諸天等，依何而住？”

阿難白佛言：“世尊！不可思議業力所致。”

佛語阿難：“不思議業汝可知耶？”

答言：“不也。”

佛告阿難：“諸佛及眾生善根業力，汝可知耶？”

¹〔第〕—【聖】

²卷第十八缺【宮】

³〔大〕—【明】

⁴三藏+（法師）【明】

⁵二=下【元】

答言：“不也。世尊！我今於此法中實無所惑，為破未來疑網故發斯問。”

佛告阿難：“彼極樂界，其地無海而有諸河，河之狹者滿十由旬，水之淺者十二由旬，如是諸河深廣之量或二十、三十乃至百數，或有極深廣者至千由旬。其水清冷具八功德，濬流恒激出微妙音，譬若諸天百千伎樂，安樂世界其聲普聞。有諸名花沿流而下，和風微動出種種香。居兩岸邊多栴檀樹，修條密葉交覆於河，結實開花芳輝可玩。群生遊樂隨意往來，或有涉河濯流嬉戲，感諸天水善順物宜，深淺寒溫曲從人好。阿難！大河之下地布金砂，有諸天香世無能喻，隨風散馥，雜水流飜¹。天曼陀羅花、優鉢羅花、波頭摩花、拘物²頭華、芬陀利花彌覆其上。

“復次阿難！彼國人眾或時遊覽同萃河濱，有不願聞激流之響，雖獲天耳終竟不聞。或有願聞，即時領悟百千萬種喜愛之聲，所謂佛法僧聲、止息之聲、無性聲、波羅蜜聲、十力四無所畏聲、神通聲、無作聲、無生無滅聲、寂靜聲、邊寂靜聲、極寂靜聲、大

¹ 飜=芬【宋】【元】【明】【聖】

² 物=勿【宋】【元】【明】【聖】

慈大悲聲、無生法忍聲、灌頂受位聲。得聞如是種種聲已，¹獲得廣大愛樂歡悅，而與觀察相應、厭離相應、滅壞相應、寂靜相應、邊寂靜相應、極寂靜相應、義味相應、佛法僧相應、力無畏相應、神通相應、止息相應、菩提相應、聲聞相應、涅槃相應。

“復次阿難！彼極樂世界，不聞諸惡趣名、邊無障礙煩惱覆蔽名、無有地獄琰摩畜生名、邊無八難名，亦無苦受不苦不樂受名，尚無假設何況實苦，是故彼國名為極樂。阿難！我今略說極樂因緣，若廣說者窮劫不盡。

“復次阿難！彼極樂世界所有眾生，或已生、或現生、或當生，皆得如是諸妙色身，形貌端正神通自在，福力具足，受用種種宮殿園林、衣服飲食、香華瓔珞，隨意所須悉皆如念，譬如他化自在諸天。

“復次阿難！彼佛國中有微細食，諸有情類嘗無噉者，如第六天隨所思念如是飲食即同食已，色力增長而無便穢。復有無量如意妙香、塗香、末香，其香普熏彼佛國界。及散花幢幡亦皆遍滿。其有欲聞香者

¹ 獲=復【明】

隨願即聞，或不樂者終無所受。復有無量上妙衣服寶冠、環釧耳¹璫、瓔珞花鬘帶鎖，諸寶莊嚴，無量光明百千妙色悉皆具足，自然在身。復有金銀真珠妙寶之網，懸諸寶鈴周遍嚴飾。若諸有情所須宮殿樓閣等，隨所樂欲高下長短廣狹方圓，及諸床座妙衣敷上，以種種寶而嚴飾之，於眾生前自然出現，人皆自謂各處其宮。

“復次阿難！極樂國土所有眾生無差別相，順餘方俗有天人名。阿難！譬如下賤半挖迦人，對於輪王則無可論，威光德望悉皆無有。又如帝釋方第六天，威光等類皆所不及，園苑宮殿、衣服雜飾、尊貴自在、階位神通及以變化不可為比，唯受法樂則無差別。阿難應知，彼國有情猶如他化自在天王。

“阿難！彼極樂界於晨朝時，周遍四方和風微動不逆不亂，吹諸雜花種種香氣，其香普熏周遍國界。一切有情為風觸身，安和調適猶如比丘得滅盡定。其風吹動七寶樹林，華飄成聚高七人量，種種色光照曜佛土。譬如有人以花布地手按令平，隨雜色花間錯分

¹ 耳=珥【宋】【聖】

布。彼諸花聚亦復如是，其花微妙廣大柔軟如兜羅綿，若諸有情足蹈彼花沒深四指，隨其舉足還復如初。過晨朝已其花自然沒入於地，舊花既沒大地清淨，更雨新花還復周遍。如是中時、晡時、初中後夜，飄花成聚亦復如是。阿難！一切廣大珍奇之寶，無有不生極樂界者。

“阿難！彼佛國中有七寶蓮花，一一蓮花有無量百千億葉，其葉有無量百千珍奇異色，以百千摩尼妙寶莊嚴，覆以寶網轉相映飾。阿難！彼蓮花量或半由旬，或一二三四乃至百千由旬者。是一一花出三十六億那由他百千光明，一一光中出三十六億那由他百千諸佛，身如金色，具¹三十二大丈夫相、八十隨好，殊勝莊嚴，放百千光普照世界。是諸佛等，現往東方為眾說法，皆為安立無量有情於佛法中；南西北方四維上下亦復如是。

“復次阿難！極樂世界無有昏闇亦無火光，涌泉陂湖彼皆非有，亦無住著家室林苑之名，及表示之像

¹ 具=其【明】

幼童色類，亦無日月晝夜之像。於一切處標式既無亦無名號，唯除如來所加威者。

“阿難！彼國眾生若當生者，皆悉究竟無上菩提到涅槃處。何以故？若邪定聚及不定聚，不能了知建立彼因故。

“阿難！東方如恒沙界，一一界中如恒沙¹佛，彼諸佛等各各稱歎阿彌陀佛無量功德；南西北方四維上下諸佛稱讚亦復如是。何以故？他方佛國所有眾生聞無量壽如來名號，乃至能發一念淨信歡喜愛樂，所有善根迴向願生無量壽國者，隨願皆生，得不退轉乃至無上正等菩提，除五無間、誹毀²正法及謗聖者。

“阿難！若有眾生於他佛剎發菩提心，專念無量壽佛，及恒種殖³眾多善根，發心迴向願生彼國。是人臨命終時，無量壽佛與比丘眾前後圍繞現其人前，即隨如來往生彼國得不退轉，當證無上正等菩提。是故阿難！若有善男子、善女人，願生極樂世界、欲見無量壽佛者，應發無上菩提心，復當專念極樂國土，積

¹ 沙=砂【聖】

² 毀=謗【宋】【元】【明】

³ 殖=植【宋】

集善根應持迴向，由此見佛生彼國中，得不退轉乃至無上菩提。阿難！若他國眾生發菩提心，雖不專念無量壽佛，亦非恒種眾多善根，隨已修行諸善功德，迴向彼佛願欲往生。此人臨命終時，無量壽佛即遣化身，與比丘眾前後圍繞，其所化佛光明相好與真無異，現其人前攝受導引。即隨化佛往生其國，得不退轉無上菩提。阿難！若有眾生住大乘者，以清淨心向無量壽如來，乃至十念念無量壽佛願生其國，聞甚深法即生信解，心無疑惑。乃至獲得一念淨心，發一念心念無量壽佛，此人臨命終時，如在夢中見無量壽佛，定生彼國得不退轉無上菩提。阿難！以此義利故，無量無數不可思議無有等等無邊世界諸佛如來，皆共稱讚無量壽佛所有功德。”

佛告阿難：“東方如恒河沙界，一一界中有如恒沙¹菩薩，為欲瞻禮供養無量壽佛及諸聖眾來詣佛所；南西北方四維上下亦復如是。”

爾時世尊而說頌曰：

“東方諸佛刹，數如恒河沙，

¹ 沙=砂【聖】

如是佛土中，恒沙¹菩薩眾，
皆現神通來，禮無量壽佛；
三方諸聖眾，禮觀亦同歸。
彼於沙²界中，道光諸辯論，
住深禪定樂，四無所畏心。
各齋眾妙花，名香皆可悅，
并奏諸天樂，百千和雅音，
以獻天人師，名聞十方者。
究竟威神力，善學諸法門，
種種供養中，勤修無懈怠³，
功德智慧景，能破諸幽冥，
咸以尊重心，奉諸珍妙供。
彼觀殊勝刹，菩薩眾無邊，
願速成菩提，淨界如安樂。
世尊知欲樂，廣大不思議，
微笑現⁴金容，告成如所願。

¹ 沙=砂【聖】

² 沙=砂【聖】

³ 倦=怠【明】

⁴ 現=見【宋】【元】【明】【聖】

了諸法如幻，佛國猶夢響，
恒發誓莊嚴，當成微妙土。
菩薩以願力，修勝菩提行，
知土如影像，發諸弘誓心。
若求遍清淨，殊勝無邊刹，
聞佛聖德名，願生安樂國。
若有諸菩薩，志求清淨土，
了知法無我，願生安樂國。

“復次阿難！極樂世界所有菩薩，於無上菩提皆悉安住一生補處，唯除大願能師子吼擲大甲冑摩訶薩眾為度群生修大涅槃者。

“復次阿難！彼佛刹中諸聲聞眾，皆有身光能照一尋。菩薩光照極百千尋，除二菩薩光明常照三千大千世界。”

阿難白佛言：“世尊！彼二菩薩名為何等？”

佛告阿難：“汝今諦聽。彼二菩薩，一名觀自在，二名大勢至。阿難！此二菩薩從娑婆世界捨壽量已往生彼國。

“阿難！彼極樂界所生菩薩皆具三十二相，膚體柔軟、諸根聰利、智慧善巧，於差別法無不了知，禪

定神通善能遊戲，皆非薄德鈍根之流。彼菩薩中有得初忍或第二忍者無量無邊，或有證得無生法忍。

“阿難！彼國菩薩，乃至菩提不墮惡趣，生生之處能了宿命，唯除五濁剎中出現於世。

“阿難！彼國菩薩皆於晨朝供養他方無量百千諸佛，隨所希求種種花鬘、塗香、末香、幢幡、繒蓋及諸音樂，以佛神力皆現手中供養諸佛。如是供具廣大甚多，無數無邊不可思議。若復樂求種種名花，花有無量百千光色，皆現手中奉散諸佛。阿難！其所散花，即於空中變成花蓋，蓋之小者滿十由旬，若不更以新花重散，前所散花終不墮落。阿難！或有花蓋滿二十由旬，如是三十四十乃至千由旬，或等四洲或遍小千中千，乃至三千大千世界。此諸菩薩生希有心得大喜愛，於晨朝時奉事供養尊重讚歎無量百千億那由他佛，及種諸善根已，即於晨朝還到本國。此皆由無量壽佛本願加威，及曾供¹如來善根相續無缺減故、善修習故、善攝取故、善成就故。

¹ 供+（養）【宋】【元】【明】

“復次阿難！彼極樂界諸菩薩眾，所說語言與一切智相應，於所受用皆無攝取，遍遊佛刹無愛無厭亦無希求。不希求想，無自想、無煩惱想、無我想、無鬪諍相違怨瞋之想。何以故？彼諸菩薩於一切眾生有大慈悲利益心故，有柔軟無障礙心、不濁心、無忿恨心，有平等調伏寂靜之心、忍心、忍調伏心，有等引澄淨無散亂心、無覆蔽心、淨心、極淨心、照曜心、無塵心、大威德心、善心、廣大心、無比心、甚深心、愛法心、喜法心¹、善意心、捨離一切執著心、斷一切眾生煩惱心、閉一切惡趣心故，行智慧行已成就無量功德，於禪定覺分善能演說，而常遊戲無上菩提勤修敷演。肉眼發生能有簡擇，天眼出現鑒諸佛土，法眼清淨能離諸著，慧眼通達到於彼岸，佛眼成就覺悟開示，生無礙慧為他廣說。於三界中平等勤修，既自調伏亦能調伏一切有情，能令獲得勝奢摩他。於一切法證無所得，善能說法言辭巧妙，勤修供養一切諸佛，摧伏有情一切煩惱，為諸如來之所悅可，而能如是如是思惟。作是思惟時，能集能見一切諸法皆無所得，

¹ 法心=心法【宋】【元】【明】【聖】

以方便智修行滅法，善知取捨理非理趣，於理趣非理趣中皆得善巧。於世語言心不愛樂，出世經典誠信勤修，善巧尋求一切諸法，求一切法增長了知。知法本無實不可得，於所行處亦無取捨，解脫老病住諸功德，從本已來安住神通勤修深法，於甚深法而無退轉，於難解法悉能通達，得一乘道無有疑惑。於佛教法不由他悟，其智宏深譬之巨海，菩提高廣喻若須彌，自身威光超於日月。凡所思擇與慧相應，猶如雪山其心潔白。光明普照無邊功德，燒煩惱薪方之於火。不為善惡之所動搖，心靜常安猶如大地。洗滌煩惑如清淨水，心無所主猶如火，不著世間猶如風，養諸有情猶如地，觀諸世界如虛空。荷載眾生猶如良乘，不染世法譬之蓮花，遠暢法音猶如雷震，雨一切法方之大雨，光蔽賢聖猶彼大仙，善能調伏如大龍象，勇猛無畏如師子王，覆護眾生如尼拘陀樹，他論不動如鐵圍山，修慈無量如彼恒河。諸善法王能為前導如大梵天，無所聚積猶如飛鳥，摧伏他論如金翅王，難遇希有如優曇花。最勝丈夫其心正直，無有懈怠能善修行，於諸見中善巧決定，柔和忍辱無嫉妬心。論法無厭求法不倦，常勤演說利益眾生。戒若琉璃內外明潔，善聞諸法而為勝寶，其所說言令眾悅伏。以智慧力建大法幢、吹大

法螺¹、擊大法鼓，常樂勤修建諸法表。由智慧光心無迷²惑，遠眾過失亦無損害。以淳淨心離諸穢染，常行惠³施永捨慳貪，稟性溫和常懷慚恥。其心寂定智慧明察，作世間燈破眾生闇，堪受利⁴養殊勝福田，為大導師周濟群物。遠離憎愛心淨無憂，勇進無怖為大法將，了知地獄調伏自他，利益有情拔諸毒箭，為世間解、為世間師，引導群生捨諸愛著。永離三垢遊戲神通，因力、緣力、願力、發力、世俗力、出生力、善根力、三摩地力、聞力、捨力、戒力、忍力、精進力、定力、慧力、奢摩他力、毘鉢舍那力、神通力、念力、覺力、摧伏一切大魔軍力，并他論法力、能破一切煩惱怨力及殊勝大力，威福具足相好端嚴，智慧辯才善根圓滿。目淨脩廣人所愛樂，其身清潔遠離貢高。以尊重心奉事諸佛，於諸佛所植眾善本，拔除憍慢離貪瞋癡，殊勝吉祥應供中最。住勝智境赫奕慧光，心生歡喜雄猛無畏，福智具足無有滯限，但說所聞開示群

¹ 螺=蠶【宋】【聖】

² 迷=疑【明】

³ 惠=慧【聖】

⁴ 利=供【宋】【元】【明】，=物【聖】

物，隨所聞法皆能解了。於菩提分法勇猛勤修，空無相願而常安住，及不生不滅諸三摩地，行遍道場遠二乘境。阿難！我今略說彼極樂界所生菩薩摩訶薩眾真實功德悉皆如是。阿難！假令我身住壽百千億那由他劫，以無礙辯欲具稱揚彼諸菩薩摩訶薩等真實功德不可窮盡。阿難！彼諸菩薩摩訶薩等，盡其壽量亦不能知。”

爾時世尊告阿難言：“此是無量壽佛極樂世界。汝應從坐而起，合掌恭敬五體投地為佛作禮。彼佛名稱遍滿十方，彼一一方恒沙諸佛皆共稱讚無礙無斷。”

是時阿難即從坐起，偏袒右肩，西面合掌五體投地，白佛言：“世尊！我今欲見極樂世界無量壽如來，并供養奉事無量百千億那由他佛及菩薩眾，種諸善根。”

時無量壽佛即於掌中放大光明，遍照百千俱胝那由他刹。彼諸佛刹所有大小諸山，黑山、寶山、須彌盧山、迷盧山、大迷盧山、目真隣陀山、摩訶目真隣陀山、鐵圍山、大鐵圍山，叢薄園林及諸宮殿天人等物，以佛光明皆悉照見。譬如有人以淨天眼觀一尋地見諸所有，又如日光出現萬物斯覩。彼諸國中比丘、比丘尼、優婆塞、優婆夷，悉見無量壽如來如須彌山

王照諸佛刹，時諸佛國皆悉明現如處一尋。以無量壽如來殊勝光明極清淨故，見彼高座及諸聲聞、菩薩等眾。譬如大地洪水盈滿，樹林山河皆沒不現，唯有大水。

“如是阿難！彼佛刹中無有他論及異形類，唯除一切大聲聞眾一尋光明，及彼菩薩摩訶薩踰繕那等百千尋光。”彼無量壽如來、應、正等覺光明，映蔽一切聲聞及諸菩薩，令諸有情悉皆得見。彼極樂界菩薩、聲聞、人天眾等，一切皆覩娑婆世界釋迦如來，及比丘眾圍繞說法。

爾時佛告彌勒菩薩言：“汝頗見具足清淨威德莊嚴佛刹，及見空中樹林園苑涌泉池沼不耶？汝見大地乃至色究竟天，於虛空中散花樹林以為莊嚴。復有眾鳥住虛空界出種種音，猶如佛聲普聞世界。是諸眾鳥皆是化作，非實畜生。汝見是耶？”

彌勒白佛言：“唯然已見。”

佛復告彌勒菩薩言：“汝見此諸眾生入踰繕那百千宮殿已，遊行虛空無著無礙，遍諸刹土供養諸佛，及見彼有情於晝夜分念佛相續不耶？”

彌勒白言：“唯然盡見。”

佛復告言：“汝見他化自在天與極樂諸人受用資具有差別不？”

彌勒白言：“我不見彼有少差別。”

佛告彌勒：“汝見極樂世界人住胎不？”

彌勒白言：“世尊！譬如三十三天夜摩天等，人百由旬若五百由旬宮殿之內遊戲歡樂。我見極樂世界人住胎者如夜摩天處於宮殿，又見眾生於蓮華內結加¹趺坐自然化生。”

時彌勒菩薩復白佛言：“世尊！何因緣故，彼國眾生有胎生者、化生者？”

佛告彌勒：“若有眾生墮於疑悔積集善根，希求佛智、普遍智、不思議智、無等智、威德智、廣大智。於自善根不能生信，以此因緣，於五百歲住宮殿中，不見佛、不聞法、不見菩薩及聲聞眾。若有眾生斷除疑悔積集善根，希求佛智乃至廣大智，信已善根。此人於蓮華內結加²趺坐忽然化生，瞬息而出。譬如他國有人來至，而此菩薩亦復如是。餘國發心來生極樂，見無量壽佛奉事供養，及諸菩薩聲聞之眾。阿逸多！

¹ 加=跏【宋】，【聖】

² 加=跏【宋】，【聖】

汝觀殊勝智者，彼因廣慧力故受彼化生，於蓮花中結加¹趺坐。汝觀下劣之輩，於五百歲中不見佛、不聞法、不見菩薩及聲聞眾，不知菩薩威儀法則，不能修習諸功德故，無因奉事無量壽佛。是諸人等皆為昔緣疑悔所致。譬如刹帝利王其子犯法，幽之內宮、處以花觀，層樓綺殿妙飾奇珍，寶帳金床重敷茵褥，名花布地燒大寶香，服御所資悉皆豐備，而以閻浮金鎖繫其兩足。”

佛告彌勒：“於意云何？彼王子心寧樂此不？”

答言：“不也。世尊！彼幽繫時常思解脫，求諸親識居士宰官長者近臣。王之太子雖希出離終不從心，乃至刹帝利王心生歡喜方得解脫。”

佛告彌勒：“如是如是。若有墮於疑悔，種諸善根希求佛智乃至廣大智，於自善根不能生信。由聞佛名起信心故，雖生彼國，於蓮花中不得出現。彼等眾生處花胎中，猶如園苑宮殿之想。何以故？彼中清淨無諸穢惡，一切無有不可樂者。然彼眾生於五百歲，不見佛、不聞法、不見菩薩及聲聞眾，不得供養奉事諸佛，不得問於菩薩法藏。遠離一切殊勝善根，彼等

¹ 加=跏【宋】、【聖】

於中不生欣樂，不能出現修習善法；往昔世中過失盡已然後乃出，彼於出時，心迷上下四方之所。若五百歲無疑惑者，即當供養無量百千俱胝那由他佛，并種無量無邊善根。汝阿逸多！當知疑惑與諸菩薩為大損害。”

爾時彌勒菩薩白佛言：“世尊！於此國界不退菩薩，當生極樂國者，其數幾何？”

佛告彌勒：“此佛土中有七十二億菩薩，彼於無量億那由他百千佛所種諸善根成不退轉，當生彼國。況餘菩薩由少善根生彼國者，不可稱計。阿逸多！從難忍如來佛國，有十八億不退菩薩當生極樂世界。東北方寶藏佛國中，有九十億不退菩薩當生彼土。從無量聲如來國中，有二十二億不退菩薩當生彼土。從光明如來國中，有三十二億不退菩薩當生彼土。從龍天如來國中，有十四億不退菩薩當生彼土。從勝天力如來國中，有十二千不退菩薩當生彼土。從師子如來國中，有五百不退菩薩當生彼土。從離塵如來國中，有八十一億不退菩薩當生彼土。從世天如來國中，有六十億不退菩薩當生彼土。從勝積如來國中，有六十億不退菩薩當生彼土。從人王如來國中，有十俱胝不退菩薩當生彼土。從勝花如來國中，有五百菩薩具大精

進發趣一乘，於七日中能令眾生離百千億那由他劫生死流轉，彼等亦當生極樂界。從發起精進如來國中，有六十九億不退菩薩當生彼土，到彼國已，供養禮拜無量壽如來及菩薩眾。阿逸多！我若具說諸方菩薩生極樂界，若已到、今到、當到，為供養禮拜瞻仰無量壽佛等者，但說其名窮劫不盡。

“阿逸多！汝觀彼諸菩薩摩訶薩善獲利益，若有聞彼佛名能生一念喜愛之心，當獲如上所說功德，心無下劣亦不貢高，成就善根悉皆增上。阿逸多！是故告汝及天人、世間、阿修羅等，今此法門付囑於汝。應當愛樂修習，乃至經一晝夜受持讀誦生希望心，於大眾中為他開示，當令書寫執持¹經卷，於此經中生導師想。

“阿逸多！是故菩薩摩訶薩，欲令無量諸眾生等速疾安住不退轉於阿耨多羅三藐三菩提，及欲見彼廣大莊嚴攝受殊勝佛刹圓滿功德者，應當起精進力聽此法門。假使經過大千世界滿中猛火，為求法故不生退屈諂偽之心，讀誦受持書寫經卷，乃至於須臾頃為他

¹ 持=此【明】

開示，勸令聽聞不生憂惱，設入大火不應疑悔。何以故？彼無量億諸菩薩等皆悉求此微妙法門，尊重聽聞不生違背。是故汝等應求此法。阿逸多！彼諸眾生獲大善利，若於來世乃至正法滅時，當有眾生殖¹諸善本，已曾供養無量諸佛，由彼如來加威力故，能得如是廣大法門，一切如來稱讚悅可。若於彼法攝取受持，當獲廣大一切智智，隨意所樂種諸善根。若善男子善女人等，於彼法中廣大勝解之者，當能聽聞獲大歡喜，受持讀誦廣為他說常樂修行。阿逸多！無量億數諸菩薩等求請此法不曾厭背，是故汝等諸善男子及善女人，於今來世能於是法，若已求、現求、當求者，皆獲善利。

“阿逸多！如來所應作者皆已作之。汝等應當安住無疑種諸善本，應常修學使無疑滯，不入一切種類珍寶成就牢獄。阿逸多！如是等類大威德者，能生廣大佛法異門，由於此法不聽聞故，有一億菩薩退轉阿耨多羅三藐三菩提。阿逸多！佛出世難，離八難身亦為難得。諸佛如來無上之法，十力無畏無礙無著甚深

¹ 殖=植【元】

之法，及波羅蜜等菩薩之法，能說法人亦難開示。阿逸多！善說法人非易可遇，堅固深信時亦難遭。是故我今如理宣說，汝等修習應如教住。

“汝阿逸多！我以此法門及諸佛法囑累於汝，汝當修行無令滅沒。如是廣大微妙法門，一切諸佛之所稱讚。勿違佛教而棄捨之，當令汝等獲不善利，淪沒長夜備眾危苦。是故我今為大囑累，當令是法久住不滅，應勤修行隨順我教。”

爾時世尊而說頌曰：

“若於福德初未修，終不聞斯微妙法；
勇猛能成諸善利，當聞如是甚深經。
彼人曾見諸世尊，能作大光拯濁世，
多聞總持如巨海，彼獲聖賢喜愛心。
懈怠邪見下劣人，不信如來斯正法；
若曾於佛殖²眾善，救世之行彼能修。
譬如盲人恒處闇，不能開導於他路；
聲聞於佛智亦然，況餘有情而悟解。
如來功德佛自知，唯有世尊能開示，

¹ 懈=解【明】

² 殖=植【明】

天龍夜叉所不及，二乘自絕於名言。
若諸有情當作佛，行超普賢登彼岸，
敷演一佛之功德，時逾多劫不思議，
於是中間身滅度，佛之勝慧莫能量。
是故具足於信聞，及諸善友之攝受，
得聞如是深妙法，當獲愛重諸聖尊。
如來勝智遍虛空，所說義言唯佛悟，
是故博聞諸智士，應信我教如實言。
人趣之身得甚難，如來出世遇亦難，
信慧多時方乃獲，是故修者應精進。
如是妙法已聽聞，常念諸佛而生喜，
彼人往昔真吾友，善能樂欲佛菩提。”

爾時世尊說是經已，天人世間有萬二千那由他億
眾生遠塵離¹垢得法眼淨；二十億眾生得阿那含果；六
千八百比丘諸漏已盡心得解脫；四十億菩薩於無上菩
提住不退轉，被大甲冑當成正覺；有二十五億眾生得
不退忍；有四萬億那由他百千眾生於無上菩提未曾發
意，今始初發種諸善根，願生極樂世界見阿彌陀佛，

¹ 塵離 = 離塵【明】

皆當往生彼如來土，各於異方次第成佛同名妙音。有八萬億那由他眾生，得授記法忍成無上菩提。彼無量壽佛昔行菩薩道時成熟有情，悉皆當生極樂世界，憶念儔¹昔所發思願皆得成滿。

爾時三千大千世界六種震動，并現種種希有神變，放大光明普照世界。無量億那由他百千天人，同時音樂不鼓自鳴，雨天曼陀羅花沒至于膝；乃至阿迦膩吒天，皆作種種殊²妙供養。

佛說經已，彌勒菩薩等及尊者阿難，一切大眾，聞佛所說，皆大歡喜。

大寶積經卷第十八³

¹ 儔=疇【明】

² 明註曰殊南藏作微

³ 光明皇后願文【聖】

回向偈

文殊室利勇猛智，普賢慧行亦復然，
我今回向諸善根，隨彼一切常修學。
三世諸佛我稱歎，如是最勝諸大願，
我今回向諸善根，為得普賢殊勝行。
以此功德施眾生，福德智慧所積聚，
福德智慧所發生，獲得最妙二勝身。
一藥能治諸苦難，一切安樂發生地，
願得供養及恭敬，聖教永遠常住世。
諸佛菩薩攝授力，因緣不爽真實力，
並以我信清淨力，一切所願皆圓滿。

願以此功德，莊嚴佛淨土。
上報四重恩，下濟三途苦。
若有見聞者，悉發菩提心。
盡此一報身，同生極樂國。

法施功德

《金光明最勝王經》雲：

由其法施，有五用利故。雲何為五？即：

（一）法施兼利自他，財施不爾。

（二）法施能令眾生出於三界，財施之福不出欲界。

（三）法施能淨法身，財施但唯增長於色。

（四）法施無窮，財施有盡。

（五）法施能斷無明，財施唯伏貪愛。

本書由全樹剛發心恭印 3000 冊

普為出資及讀誦受持
輾轉流通者回向偈曰

願以此功德，消除宿現業，
增長諸福慧，圓成勝善根。
所有刀兵劫，及與饑饉等，
悉皆盡滅除，人各習禮讓。
讀誦受持人，輾轉流通者，
現眷咸安樂，先亡獲超升。
風雨常調順，人民悉康寧，
法界諸含識，同證無上道。
普願見聞者，此生皆解脫，
盡此一報身，同生極樂國。